

民國五年重修

淮陽縣志

卷首 圖經

卷一

地輿志上

星野

沿革

表附

疆域

村保集鎮附

山水

碑口附

卷二

地輿志下

古蹟

冢墓附

風土

卷三

籍賦志

戶口

丁地

征解

留支

蠲緩

雜稅

鹽引

卷四

建置志

城池

宮署

壇廟

坊表

橋梁

卷五

學校志

學宮 學署 學額 學田 書院 義塾

卷六

經政志

秩祀 禮儀 兵防 郵政 倉儲 郵政

卷七

職官表 名宦傳

卷八

選舉表

辟舉 文武科目 貢生 學校畢業
文武例仕 封贈 世襲 恩廕

卷九

人物傳上

先賢 鄉賢 先正 文仕蹟 武仕蹟

卷十

人物傳上

孝友 忠烈

卷十一

人物傳上

義行

卷十二

人物傳上

文學 隱逸

卷十三

人物傳上

方技 耆壽

流寓

目錄

卷十四

人物傳下

列女

后妃

節婦

卷十五

人物傳下

列女

節婦

卷十六

人物傳下

列女

烈婦

孝婦

淑媛

貞女

烈女

孝女

卷十七

藝文志上

著述 金石

卷十八

藝文志下

輯類文

詔勅
祭文

表疏
誌銘

碑記

論辨序引

卷十九

藝文志下

輯類詩

賦頌
古樂府

古詩
歌詞

五七古

五七律

五七絕

卷二十

雜誌上

災異

兵事

雜誌下

方外

寺觀

志餘

淮陽縣志卷十九

志

藝文下 輯類詩

賦頌 古詩 五七古 五七律 五七絕 古樂府

歌詞

賦頌

瑞麥賦

宋 祁

冠三輔之上者莫過於陳接五穀之乏者孰先於麥當乘離之令
序挺降甦之瑞殖盛氣雲鬱混鱗隰之初霏密穗金繁動星田之
霽色兩歧旁秀六穗並出厥華芄芄厥穎粟粟田峻奔告守臣駭
觀俾來以圖悉送上官宅穀弗書示麥禾之最重吾王攸助知稼
穡之維艱沫北爰采罔邵乎力農關中益種無聞於錫祉詎若天
極歸貺明神効異借蕃椒之盈升配命禾而合穗迎眉宙之休氣

冠中田之嘉穀續我於瑞圖辨我於凡菽蒙至尊之渥惠播頌聲
於弦次上可以薦清廟之馨品下可以助外饗之食劑

遊蓮池賦

明宋闕名

成化改元丁亥之歲奉勅渡河考較殿最遂與二三同侶越大梁
濟雙溝望南頓踰宛邱適金氣之方應而大火之西流乃泛蓮池
以入目蕩漾乘扁舟渺予望兮百里同錦錯而雲稠其水鳥則有
鸕鶿洵河鳧雁鴛鴦屬玉鸚鵡鴛鴦錦駝其植物則有葭菼江蘼
黃蘆綠莎蕙芷蘭蓀蘋蘩菱荷較其色香之尤美則又莫若蓮之
爲獨多也觀夫亭亭淨植紅香滿湖或傾或醉或倚或扶或倒影
如自照或隔葉如相呼長如美婦低若女奴至於風折沉波翻紅
綠彷彿玉環華清初浴半含半笑旖旎生香有若宓妃凌波欲
舞烟昏露溼相偎如泣有若皇英望嶷愁立風搖素質嫋嫋婷婷

有若嫦娥舞於廣庭枯蒲橫映折葦斜隔有若鄰姬偷光夜績其
爲狀也萬變不一至若菱蒲菰米荇蓼游龍或組絲而蔓綠或婉
變而耐紅間參差於倚菱咸欲窺映於孤篷於是乃邀同遊諸子
放歌中流卧而復興摘蓮房擲水菱狎鷗鷺呼魚鬻酬光武於荒
祠稽瞻星於子陵顧謂客曰子亦知此之有足徵者乎方其戰昆
陽破尋邑當戎馬之交馳適雷雨之雷雲是以嚴生不能爲之謀
而虎豹亦股栗而辟易俾赤帝之中興而干戈之載戢也而今竟
何如哉今吾與子幸際太平羣英滿朝臣皆稷契君同禹堯時方
無事足以逍遙樂鳶魚之一天又何以間於漁樵客起讓予曰吾
聞出處不同仕隱兩途若舟之不可以陸通而車之不足以泛湖
彼漁樵之所樂又豈君子章縫者之足知乎噫人亦有言小隱山
林大隱朝市蓋其心苟靜矣雖處朝市而何以異於山林苟爲不

然將曰憧憧而不已我非漁樵推其所樂殆無不同子既非我又安知予之不知彼三問不對客笑而起予乃命酒折荷爲碧筒之杯載歌而飲客曰荷之中通兮清以香子飲勿疑兮終吾生以徜徉又歌曰荷之華吾可以爲鏡荷之實吾可以爲飲子飲勿辭兮聊逍遙以容與於是賓倡主酬啣杯抵掌揚桂棹擊蘭橈蕩紅葩凌沅漭相與暢懷而忘倦不知扁舟之達

清

畫卦臺賦

雷方曉

邑人下同

式望平蕪白雲迷漫下上天光澄涵霄漢水荇參差沙禽繚亂孔聖絃歌之邠蘇子讀書之畔宛邱左右婆婆之市已虛白龜池邊龍馬之圖可按發精蘊于清寧抉幽微於爻象大啟千聖之傳肇開十翼之贊巍然而高峙者不既歸歸城闕也哉昔者伏犧氏之

王天下也定鼎中州冠三皇而首出作都陳國肇五帝以開先應
玉衡在璇璇俯察地仰觀天神通河洛德配坤乾圖苞攸出儀象
斯傳一六二七數聯竒偶生成圖徑位列方圓據大衍之數五十
有五類萬物之情萬有二千吉凶悔吝生乎動陰陽老少用其先
鬼神之情狀畢見造化之精蘊盡宣爾乃天地定山澤通交水火
薄雷風摩盪乎東西南北殺列乎春夏秋冬三百六旬由此兩衍
六十四卦因之而重連山首乎艮象歸藏卷乎坤宮文王囚羑里
而繫辭尼父絕韋編而開宗孰不洞鴻濛之府而自參闔闕之躬
若夫玄疑於僭虛陷於空沙隨傳占驗之法麻衣據正心之蹤弄
夫觀乎運會考亭衍夫啟蒙自一畫而生有貞有悔兼三才而兩
無始無終此千古文字之所以肇而萬世卜筮之所由崇也吁嗟
平鳥啼幽徑花落荒原春風靡曼夜月黃昏遊人俯平臺而舒嘯

過客拜古冢以招魂痛微言之既渺悵異說之方喧參玄機于離坎審鑿度于乾坤會天元之一指信吾道之獨尊于時風來西浦月印東門見城煙之縹緲眇水波之潺湲飄飄乎凌虛御空恍畫前之有易適適然登高作賦忽悟後而忘言

蒼草賦

錢廷文 見前

太昊伏羲氏陵蒼草周阿而生聖神之域靈物斯榮乃爲賦曰夫何茲草之靈異兮紛叢生乎古域及商虺之率厲兮華猗猗其發色竦八尺之修莖兮著圓神之令德將擇地而敷榮兮依昔皇之埏側等少室之奇產兮絕蓬蒿與荆棘彼留夷及揭車兮固枝葉之峻茂騷客紉以爲佩兮暨芳澤而雜糅雖薊氣之穹隆兮非筮人之所鯁揲斯草以決疑兮譬懸鐘之待叩待倚伏之未然兮每無求而不授微以通於神明兮顯以播於宇宙雖蒼短而龜長兮

終筮先而卜後陋猪肩與牛膊兮信著者而龜舊或受業於郭公
兮出九卷於青囊擅英名於八區兮嗤漢室之京房或端著於成
都兮析利害於毫芒得百錢而閉肆兮授老子以徜徉咸有藉於
名著兮視百莖如琳瑯伊茲物之足珍兮其芝菌而爲祥亦盛時
之嘉瑞兮永懷之而不忘聊濡毫以成賦兮寄遙思於羲皇

西園賦

有序

前人

蓋聞碑藏斷岫千秋說羊祐之山草長荒臺一日下雍門之
淚問清漳之歌舞麋鹿曾遊想泌水之繁華風月不再此則
撫今追昔難云太上之忘情而繪怨言愁不減長逝之私恨
也又况堂留綠野孔北海泛酒之鄉苑枕清流謝東山携妓
之地則青衫落淚獨憐此地之春花白日銷魂共悲當年之
夜雨雖瞻雲就日幸沐千里之湖山而抹月披風且述一方
之佳麗淹運作賦枚舉詎可聯肩涉
獵綴辭劉畫差堪接迹云爾其辭曰

地當鴻溝壤接陽夏俗耽花月之癖人愛登臨之暇則有垂崖先

生骯髒僕射抗旂則威險秋霜擣翰則榮曜春華鳥啼爛斑之女

牆草砌蕭條之宮舍徜徉潁川之原徘徊宛邱之下意奪神駭誰
畫十里之煙林心折骨驚我愛一川之臺榭則見天堂名清思閑
號冷風月色一灘訝綠蘋之早白霞光半樹笑青楓之先紅襄岸
夷塗廣衍奚極雕楹玉碣爽塏曷窮桃有堤而必斷柳無苑而不
通若乃亭擬三休臺惟一柱觸石吐雲穿花著雨糾紛連勢巖風
與苦霧直衝鬱律平原窮猿共投兔斜豎粼粼波色蛙翻水底之
笙歌隱隱山光鶯轉樓頭之簫鼓發榮吐秀爭羨弋林累轂疊踪
競趨釣渚過輞川之別墅骨騰肉飛到金谷之名園神藻形姑當
夫天清日麗霞駁雲蔚談若風生思如泉沸酒旗歌扇追昔夢於
平生硯匣筆床想前游於鬢髯誰拔眼中之丁徒恨當時之謂及
夫雲垂天低風噪雨嘯羞感時而傷神懶促席而索笑溪邊之物
色自佳林畔之鶯聲空妙惟有凭欄徒倚登樓瞻眺而已既而高

閣獨坐故人忽來苔掩陳思之蓋月冷魏武之臺問堂前之荆棘
良有以也攀園內之桃李尙忍言哉其在今也剩水殘雲頽垣斷
嶺荒葛縈塗澤葵依井往事隨綠水同流香名偕清風並永訪華
門之五柳如見淵明尋孤山之一村疑逢和靖奚必躑躅於鶯花
之窟往來於池館之境也辭曰古有人兮不可見腸如霹靂眼如
電高臺曲池久成空秋飛鴻兮春飛燕又曰世間榮名方爲響寥
落西園淨如埽丹心常傍嶺頭雲風流掩耿青葱草

後西園賦

前人

乃有耽虛辭客好靜高士嘯歌煙霞跌宕文史餐暇日之菘韭自
有春秋訪勝地之風煙豈無姓氏名園湮沒猶見故老之徬徨祕
宇摧殘尙餘曲逕之逶迤雙燕與獨鶴斜飛斷橋偕荒村錯峙考
其興廢之由邈厥經營之始於是耽虛辭客情駭意悚精浮神淪

臨高邱而灑淚顧歧路而沾巾天清冷而無色野曠朗而無塵乃
喟然而歎曰此西園之廢址也當夫張公在陳斯園始建築牆穿
池心縱勞而何疲卧酒吞花客屢遊而不倦遊鱗滌滯菡萏婉變
竹影翳藹禽聲宛轉西園之皂蓋常隨北關之丹心不變蓋將借
風月爲排遣亦且賴鶯花而陶衍也豈知烟斷火絕星移物換濯
然瓦解渙然水泮水流花謝惟誌舊日之樓臺劫盡灰飛我問當
年之漁館家家之牛馬晨趨處處之狐兔夜竄園荒金谷觸目興
悲巷改烏衣臨風茹歎且夫人何世而弗新世何人之能故當夫
勝氣籠霄飛談捲霧高歌則情動鬼神摘藻則筆驚風雨歲無春
而不秋日無朝而不暮徒喻形影於河山馳精爽於邱墓而已乃
知人之於世也危素卵之累殼甚元鳥之巢幕哀春樹之秋枯痛
晨施之夜落踞海上之青峯跨雲中之白鶴奚必踉蹌於園圃蹠

躐於樓閣也言未既好辭高士曰吾聞張公之爲政也志存社稷
功在乾坤訓若風行應如草翻創道德之囿恢仁惠之園能使枯
株敷秀窮澗發源馳秋霜之嚴威霑春雨之渥恩不得已而秉清
夜之燭開白日之樽籬挂護花之鈴花豎衝風之幡亦聊以抒其
牢落安其偃蹇而已今其池臺雖盡風流猶存瞻峴首之碑莫問
城闕思中牟之化且薦蘋蘩且張公之視西園也如過眼之浮雲
如戀頭之破帽神遊蕩蕩之天心契元元之奧而予乃欲傲仙人
之飛昇學隱士之高蹈是猶懼噎而廢食憎烟而毀竈也其何以
延光於將來比榮於往號乎於是二子頓足起舞抗音高歌歌曰
懷伊人兮步高邱燕啁啾兮鹿呦呦高臺傾兮曲渚平風騷騷兮
我心愁又歌曰水長流山長在問西園兮無冠蓋仰高山兮竟難
忘羌臨風兮發永嘅

頌

瑞麥頌 并序

邑令 許佩璜

乾隆九年四月五日王子郡掾吏傅珣於北鄉見有小麥一
 莖四穗者越二日甲寅農民谷印復於西鄉見有大麥一莖
 五穗者南東二鄉兩歧綿野村農持告郡守驗實狀申布政
 使司巡撫都御史函討上之候奏進者臣聞體元則大品
 物所以流形樹德務茲百嘉因之櫛楙故十千維耦不道行
 而其益無方百穀用成土德盛而蒸民乃粒欽惟皇上撫辰
 凝績軌物字人登寰宇於春臺思艱圖易凜御奔於秋駕吁
 食宵衣水耨火耕愍田家之作苦冷風清朔帝澤之無偏
 禱天宗於來牟迺顯蒼之休氣志壹則動誠至斯形任養於
 王孳萌於子孳出於甲族生於寅結天地之精孕陰陽之粹
 矇矓盤錯五歧表五至之符旆旆封聯四穗來四方之賀惟
 茲陳郡在古為太皞遺墟考厥旆旆封聯四穗來四方之賀惟
 隆起穎水環流左欲孟諸之廢右抱外方之麓唐為用文之
 國宋稱三輔之雄然汲黯卧治以來民多懷伎且鵠鴈渠
 而後迹久填淤淮有三洲每溢桃花之水謠聞兩鵠鴈渠
 隙之陂憶存王成秋澹旬霖雨遂致西南脆壤干鵠鴈渠
 府公既檢勘成災節使即飛章入告伏蒙皇上憂深饑溺念
 切惆悵勅下臺司亟施賑恤所逋租賦並予蠲除復遣大臣
 循行各郡恩覃春煦躋軸之疾俱消惠湛露斯樹草之情自
 樂以茲涵育用致豐穰伏自去冬雪飛盈尺已含五穀之精

迄乎今歲麥秀連疇遂啟六田之首謹按天聖之代五穗進
於陳州皇祐之朝兩歧見於伊闕守臣繪圖獻闕館閣奉勅
賦詩八百餘年再逢上瑞綴星田之露色燦乎五緯連珠擢
鱗隱之翠莖煥若九衢四照園陵新薦適符孟夏之時嘉種
降康允洽來牟之詠豈比賓連潤達侈陳瑞應之圖赤穠青
芊傳會拾遺之記而已哉臣幸際昌期式霑醴澤仰聖皇無
逸作所知稼穡之維艱讀春秋穀弗書見麥禾之最重愧
乏魯恭之化奚自產於庭中如修王象之儀竊願彰諸旂上
其辭

曰

於皇來牟始自天降我皇受之飭躬拜貺德豐澤鬯萬象一春以
和致和仁卉迺生惟此宛邱四高中下迫城如蟠瀦水疇瀉伊昔
賈鄧曾疏二渠今也則闕民其爲魚先時小禮詔下撫卹遣使循
行躬親舉實芋羹飽鵝結曷完補之助之迺衣迺殮復終舊陂
爰究爰度沿波討源導流歸壑豐周灌溉盡闢汗萊赤子扶扶襁
負而來其來孔多俶載南畝良苗懷新終善且有冬零宿雪春澍
甘膏實涵斯活發秀揚翹元氣儲精繇繇繇繇金縷歧分銀縷牙

出爰采沫北益種關中徒流逸引罔聞邵農詎如聖朝升平化洽
統和天人休徵總集太平有象其象維何四門咸闢五典式和麥
匪伊祥考祥視履根於正心五氣時舉微感攸通一本五稭織芒
含露香幹搖風唐李長源騰奏陝虢宋張商英雅歌修苗今茲駢
穠應在德元田峻來告守臣上言聖敬日躋彌示謙抑雖休勿休
上德不德稼穡爲寶至治之輝一人有慶先天弗違凡有血氣並
荷陶淑既生既植受帝之福矧臣鯁秒尤沐湛汪涓埃未效夙夜
兢惶敢謝不文輒用敷述億萬斯年垂耀無極

宛邱李公晉祀鄉賢祠頌

諱皓

呂履恒

維公降生兮嵩嶽鍾靈岐嶷呈祥兮頭角崢嶸齟齬嗜學兮過目
成誦出應童試兮鬢序蜚聲冲年知名兮學冠羣英父醮而冠焉
門欄喜盈一堂孝友兮齊芳張仲地久天長兮和樂雍雍無何時

運不偶兮大變忽生烽烟四起兮地裂山崩父子不見兮兄西弟
東吁嗟公兮何遇之窮繼而天心厭亂兮聖人亶生皇清啟運兮
定鼎燕京擴清海宇兮四海蕩平因之田園漸復兮學古服耕奮
志螢窗兮黃卷青燈日就月將兮學問老成藏器待時兮萬里鵬
程乙未廷對兮帝都覽勝庚子鄉薦兮載歌鹿鳴兩河爭羨兮八
豫馳名屢上公車兮優游帝廷考選縣尹兮志在蒼生後以家貧
親老兮急需升斗之榮因辭民社而秉鐸兮志在乎以孝作忠蒞
兩邑而陶成多士兮化雨時行閱數科而榜頭題名兮前後接踵
卧龍岡上人人戴德灑澗左右在在留芳化行南國兮新野人文
於今稱盛澤被東都兮洛陽才子羣然振興至於宛邱舊地桑梓
誼重素仰德徽久沐裁成父老扶杖兮咨嗟贊頌子弟鼓掌兮景
慕前型名以實兮而益彰事必久兮而論定維公之德維公之行

官崇祀典眾口同稱幸遇督學天使兮海內名公捧檄中州兮秉
公持衡闡幽表微兮兼之問俗採風褒德揚休兮急求賢良方正
陳郡士民因連名而以公爲請兮輿論出乎至公學憲劉公列章
而奏聞闕廷兮綸音錫自九重崇祀宮墻兮千秋享樂携手諸賢
兮同邀豆登賢英瞻拜兮以妥公靈圖橋觀聽兮懽抃躍踴千古
盛事兮惟公獨隆余忝年譜兮製辭稱頌

瑞穀亭贊有序

明陳王謨

侍御張公花亭之前有穀挺生一莖雙穗家君過而竒之歸
語小子余曰瑞穀哉請以名亭蓋古今訓注穀者善也祿也
又生也續也厥種維美厥實曰嘉乃茲雙秀產於階下嘉美
協應帝命若曰錫爾侍御樹德稔善永綏豐祿陰騭篤生駢
承嗣續一物而庶徵備矣瑞穀哉家君
頌之乃以扁公亭而余小子爲之贊

維亭有禾載嘉其名匪藪匪畚不穫不耕含中孕和天植地生以
一而生以兩而成柏臺并考蘭階競榮既頌既岐乃粒乃盈累如

賈珠聯若垂纓玉晶璨金粟熒熒維家之慶惟德之禎瑞兆駢
錫帝賚顯呈奕世頌之式穀揚聲柱史之亨義皇之城

清

警心銘 四十韻

曹荅柎 見前

心之爲物乃氣之精體立爲性用發爲情統此性情惟心之妙靜
存動察工夫有要靜存之方不外一敬主宰湛然止水明鏡動察
之方首在謹幾幾有善惡隱微難欺斯須不謹萬事立敗轉關最
捷只爭一介毫釐有差謬以千里擇之貴精要求知止知由於心
尤在格物物理心理反求各是積久豁然精粗貫通推之不盡用
之不窮天大無外人稟其全私欲不間心也一天如何後儒謂心
卽理滿街聖人無分彼此守着此心自信無偏圓覺虛寂陽儒陰
禪衆人沈迷財色名勢一點牽纏終身受制淡下諸欲本心呈露

保養擴充主敬行恕整齊嚴肅心自專一履薄臨深常此齊慄一
念不忍推之即仁立達在我斯世斯民爲忠爲孝一團熱血夫婦
知能聖賢何別爲禽爲獸亦是此心幾希去之罪在天君君子小
人判然兩路利善之間轉念即誤惟口耳目外物交引抵間乘隙
如何不謹心官惟思作聖之基銘以自警勿忘斯須

古詩

在陳操

明劉基

彼山有楊兮彼隰有樹彼路斯何兮孔棘且阻玄雲杳冥兮不日
以雨重華寂寞兮誰與晤語茫茫九州兮孰爲予所龜蒙無人兮
駕予歸處

弔李節婦

呂柟

讀陳州志見陳掌教賢母李氏之節興感不已其孫籌請賦
乃有言嗚呼思父之子懷君之臣比李氏也可能已於痛哭

哉流涕

三十喪夫七十養姑二十五里戴雨折蒲不折帶泥笋恐爲蓮花
污蓮花潔如拭泥笋姑豈蔬白日照天上照見夫君初湘江雙妃
淚點點透竹梧

清

贈孝義雷梅隱

書院趙希濂
滄氏

宛邱之下子焉道遙豈弟君子德音孔昭如圭如璋令儀台色適
道來孝孝思維則墓門有梅慙慙日瘁生我劬勞明發不昧婚姻
之故我其收之死喪之威備創救之君子有穀壽考且寧君子有
孝子尙有典型蕪葭蒼蒼淮水湯湯古之人無敦示我周行

壽祖母九十生朝

孫舉海
邑增

南山嶷嶷葵星生色仰瞻萱庭健飯有力何以得之咸曰以德發

星生色南山嶷嶙仰瞻萱庭矍鑠精神何以致之咸曰以仁曰德
曰仁於繼萱庭待觀十載瑞慶百齡悠悠南山明明婺星在以仁
長歲以德久惟德惟仁栽培深厚億萬斯年庶幾不朽婺星爭光
南山比壽

五言古

送應氏

魏陳
王曹植

步登北邙阪遙望洛陽山洛陽何寂寞宮室盡燒焚垣墻皆頽墮
荆棘上參天不見舊耆老但覩新少年側足無行逕荒疇不復田
游子久不歸不識陌與阡申路何蕭條千里無人烟念我平生親
氣結不能言

又

前人

清時難屢得嘉會不可常天地無終極人命若朝霜願得展嫵婉

我友之朔方親昵並集送置酒此河陽中饋豈能薄
質飲不盡腸
變至望苦深豈不愧中腸山川阻且遠別促會日長
願爲比翼鳥
施翮起高翔

經陳思王墓

蕭深庾肩吾

公子獨憂生邱壙擅餘名采樵枯樹盡犁田荒
隧平甯追晏平樂
詎想謁承明且余來錫命兼言事結成飄颻河朔遠
颯颯颯風鳴
雁與雲俱陣沙將蓬共驚枯桑落古社寒烏歸孤城隴
水哀笳曲
漁陽慘鼓聲離家來遠客安得不傷情

淮陽感懷

本傳云初密與揚玄感同反玄感敗密被獲用計
得脫詣淮陽變姓名爲劉智遠聚徒教授鬱鬱不

得志爲五言詩詩成泣下
數行人怪之告捕乃亡去

唐李密

金風蕩初節玉露凋晚林此夕窮塗士鬱陶傷寸心
野平蒼葦合
村荒藜藿深眺聽良多感徒倚獨霑襟
霑霑何所爲悵然懷古意

秦俗猶未平漢道將何冀樊噲市井徒蕭何刀筆吏一朝時運會
千古傳名謚寄言世上雄虛生真可媿

潁陽別元丹邱之淮陽

李白

吾將元夫子異姓爲天倫本無軒裳契素以煙霞親嘗恨迫世網
銘意俱未伸松柏雖寒苦蒼逐桃李春悠悠市朝間玉顏日淄磷
所失重山岳所得輕埃塵精神漸蕪穢衰老相憑因我有錦囊訣
可以持君身當餐黃金藥去爲紫陽巖萬事難並立百年猶崇晨
別爾東南去悠悠多悲辛前志庶不易遠塗期所遵已矣歸去來
白雲飛天津

頌魯

并序

蘇拯

昔謂孔宣父絕糧於陳蔡歷國七十二不遇其一君咸云命
不通也愚謂聖人刪詩定禮出沒行藏承天之意非由命焉
不然論語不曰天之未喪斯文也匡人其如予何又曰下學
而上達知我者其天乎以斯明矣因得爲頌魯章凡十四句

天推魯仲尼周遊布典墳遊遍七十國不令遇一君一國如一遇
單車不轉輪良由至化力爲國不爲身禮樂行未足邈邈居於陳
禮樂今有餘表旒當聖人傷哉絕糧議千載誤云云

太昊遺墟

宋 王禹偁

宛邱何隆隆草木方蔽芾羲皇不可作封樹表萬世緬惟開闢時
人物無所異雖有結繩政禮法殊未制自非神聖興孰發天地秘
人文一以宣三才道斯備立極盡恒性稽疑示精意泰和薰八紘
獨守君師位羣聖承治統百王賴書契惜哉風氣漓復古終莫逮
曰余昧先天玩象冀深詣可能窮蘊奧一理貫萬彙茲焉拜古蹟
聊以酬素志願求五十著決彼天下事

和王校勘中夏東園

晏殊

東園何所樂所樂非塵事野竹亂無行幽花晚多思閑窺魚尾赤

暗辨蜂腰細樹影密遮林藤梢狂胃袂藩蔬足登膳陶秫徑取醉
幸獲我汝交都忘今昔世歡言捧瑤佩願以疏麻繼

潁州初別子由二首

蘇軾

征帆挂西風別淚滴清潁留連知無益借此須臾景我生三度別
此別尤酸冷念子似先君本訥剛且靜寡辭真言人介石乃機警
至今天下士去莫如子猛嗟我久病狂意行無坎井有如醉且墜
幸未傷輒醒從今得閑暇默坐消日永作詩解子憂持用日三省

其二

近別不改容遠別涕霑胸咫尺不相見實與千里同人生無離別
誰知恩愛重始我來宛邱牽衣舞兒童便知有此恨留我過秋風
秋風亦已過別恨終無窮問我何年歸我言歲在東離合既循環
憂喜迭相攻語此長太息我生如飛蓬多憂髮早白不見六一翁

子由自南都來陳三日而別

前人

夫子自逐客尙能哀楚囚奔馳二百里徑來寬我憂相逢知有得
道眼清不流別來未一年落盡驕氣浮嗟我晚聞道歎歎如孫休
至言難久服放心不自收悟彼善知識妙藥應所投納之憂患場
磨以百日愁冥頑雖難化鐫發亦已周平時種種心次第去莫留
但餘無所還永與夫子遊此別何足道大江東西州畏蠅不下榻
睡足吾無求便爲齊安民何必歸故邱

糴官粟有感

張耒

持錢糴官粟日夕擁公門官價雖不高官倉常苦貧况兼閉園廩
一粒不肯分伺待官粟空騰價邀吾民坐視既不可禁之亦紛紛
擾擾田畝中果腹才幾人我欲究其源宏濶未易陳哀哉天地間
生民何苦辛

寓陳雜詩四首

前人

朝雨如霧絲咫尺不相辨
俄然晨光漏紺碧
出天回天工易明晦
頃刻俄屢變
今朝事大定
雲物卷組練
客有北來說
蛛生被數縣
穀穗無一粒
遺稗如立箭
卑田成大澤
投種哀莫見
官人惜不知
猶喜輪租辦
興懷及鰥寡
猶愧吾飽飯

開門無客來
永日不冠履
客知我老懶
投刺輒復去
端成兩相忘
因得百無慮
故人在旁郡
書信不能屢
興哀東坡公
將掩邗山墓
不能往一慟
名議真有負
可能金玉骨
亦逐黃壤腐
但恐已神仙
裂石終飛去

我不知暑退但覺衣汗乾
頗怪庭中天湛然
青以寬有物叫草根
啾啾自相喧
聞知已新秋
大火流金丸
天公變寒暑
止爾事亦繁
靜觀付一笑
吾事甯相關
但思筋力健
悠然佳意還
喧喧憎鄰里

估杯亂人眠

秦子死南海旅骨還故墟辛勤一生事空得數編書琅琅巧言語
玉佩聯瓊琚知者能幾人憎者頗有餘書生事業薄生世苦勤劬
持以待後世何足潤槁枯興懷及平昔使我涕漣如道路阻且長
悲哉違撫孤

寄李端叔

前人

陳墟自古皇疆野實楚縣沃野接神畿荒溝漕淮甸民風靜而陋
原隰平以遠我來逢艱歲禾黍秋色淺荒居咽蛩蝻風雨老藜藿
閉門謝車馬隱几親筆硯馬迹巷泥深庖烟簷日晏深居窺老易
妙理殊自玩困亨方寸足夸安勞遠願乖離感歲月老色各滿面
友道古所敦尺書莫辭倦

孫志康許爲南釀前日已聞糴米欣然作詩以問之

前人

平生一尊酒風月不可無
謫官將十年一醉未易圖
市豈無旗亭官亦有酒壚
薄苦與釀酸一滴不可沽
英英孫夫子臭味真吾徒
自云得異蘖乃出稗稻腴
藏久精粹去去者乃其粗
醞釀纔浹日芳甘已盈壺
僖人喻其方若火經茅廬
此語直野陋殆出負販夫
前日聞吉語糴粳已在途
每恨陳乏糲價直如買珠
憐君久客囊傾倒無復餘
假器走僕僮供我一笑娛
欲爲漉巾潛請學滌器如
作詩以詆之何日陳尊盃

潘郎以予生日見過致酒出兩詩

前人

東風沛甘雨百物一時好
汀邊桃李盡江紫到百草
道傍負擔子寒食歸祭禱
念我淮上邱三年不躬掃

淮陽牡丹庵盛不數伊洛姚黃
一枝開眾艷氣如爍亭亭風塵表

獨立朝萬葉誰知臨老眼更復美葵藿

弔汲黯卧治閣

明王鄰

漢家一慤臣其心固如石忠信抗九重尤稱補袞職國法日以明
君心日以格剛方屢見憚焉能久君側一麾守淮陽山川增價值
高卧半榻雲羣黎自衣食草綠訟庭閑春風滿衽席閱廢名猶存
到今沐膏澤我欲一見之凝睇不可得青史振嘉猷百世可爲則

太昊遺墟

王教

維天有天文維地有地理維人鍾二儀孕秀自皇矣至文具由衷
至理根底裏成性出天然與形俱胎胚外觸可中會三隅解旁以
有本乃如是逢原故若此先覺苟無人初迷孰與指所以古聖君
天意若驅使羲皇聖神姿剗制安厥止仰觀暨俯察地應復天啟
隨感見秀靈因心攄秘旨盈科知類充足此更通彼卦畫自申分

文字從茲始爲天顯禎符爲地呈珍祉爲後啟文明爲時昭道軌
爲人開物先爲乾稱宗子匪直代結繩且爾該政理道統肇真傳
人祖光帝紀世世享利益歷歷見經史振古兆六書迄今同萬里
德視化工均功與造物比身帝宛邱都魄葬蔡河疾血食報隆盛
億代曷窮已不朽在貞珉如存祇松梓雲日耀祠屋令人發敬只
我行道淮陽駐車瞻聖址肅拜仰靈風竭誠薦沼芷

卦臺秋月

葉盛

羲皇古神聖御寓三皇初茫茫大河上龍馬出負圖一去蔡河陽
亦有龜瑩如聖心與天契奇文昭軌模七六前後列八九左右俱
由茲啟後聖大易遂以敷維陳有遺臺下有靈著枯偉哉方冊存
萬古開羣愚

絃歌夕照

汪大燧

棲棲魯中與皇皇欲之楚已謂道路長如何復艱阻君子固已窮
明王難再覩絃歌誰爲彈一彈復再鼓上絃哀麟傷下絃悲鳳舉
因風追大雅清響流千古

登陳城西樓感淮陰侯事

前人

諸侯會陳曰國土王齊時禍福同一途憂樂更相隨榮寵豈足賴
何爲好爵糜蓋世功不賞震主身易危嗟哉漢德薄誰言平計奇
悵念商山老僊僊茹紫芝

思陵墓靄

黃哲

鄴都雄盛日英才妙七賢夫君照乘珠五色麗且鮮西園倡華藻
東洛賦嬋娟游鸞翔朝旭芳渠映碧漣始協棣華美寧虞豆萁煎
桐圭空錫社銀海碧陰泉白陽翳荆榛狐兔穴其阡喟然魚山嘆
肯企淮南僊

重過駐驛亭

朱 裡

高皇舊寰宇六合爲一家東巡過陳項駐此曾宣麻至今宛邱人
猶能思翠華亭荒但鷗鷺樹老啼昏鴉龍光終不泯長昭湖陰沙

張烈女行

州牧 戴 昕

吾陳一處子歷年方十四未行大醮禮厥夫忽云逝慨念姑在堂
依依無所恃委身欲歸養父母順其志執喪過夫廬灑血爲埋瘞
登堂慰姑心兢兢供婦事衣裳恐涼薄羹湯極滋味殫力送姑終
貞操竟不二英英閨中柔善行乃如是名留宇宙間千載知不墜
慷慨歌吾詩聞者或可勵

王烈女行

前 人

吾陳一處子乃是太原裔少年許左氏厥良因疾廢濯濯蘭蕙姿
挺出桃李輩父母欲改適潛然輒流淚強之終不可觸壁首幾碎

焚香告蒼天剪髮以自誓蓬垢務女工事親畢其志斷斷君子心
肅肅猛士氣允矣女流則俯仰庶無愧

盧烈女行

前人

吾陳一處子乃是郎官孫曾禱大母疾自少孝名聞既愛若人聘
忽驚化爲塵倉皇矚親亡自經殞其身鏡臺掩白日花枝怨青春
台豈雖未行台葬還同墳此心既已盡餘外何足云大義炳日月
清芬播乾坤國恩惟至公煌煌見旌門

小檻種竹口占遺懷

季道統邑人

吾笑陶淵明如何偏愛菊菊豈不可愛何如瀟湘竹傲霜能幾時
終被霜雪促我道竹堪憐不做亦不俗豈必千萬竿小小兩三簇
高節自足賞清陰還可掬昨夜狂風來白雲如泉瀑黃花飛欲殘
翠篠翻添綠未捲水晶簾寒色已滿屋瀟瀟琴書冷塵襟淨似浴

況且耐歲寒三友交情熟傲固非所願霜亦不能毒所以七賢輩
醉醒林之曲吾笑陶淵明如何偏愛菊

清

遊蘇氏園林

學憲

鄒升恒

試事乍得閑出郊曠心目春風染煙景堤柳藹已綠野鴨聚塘坳
清波散輕縠蘇園近可涉一逕入深竹矮柏曲編籬高松疎覆屋
藥欄始萌芽梅蕊細含馥登高聊騁望遠樹帶平陸咫尺太昊陵
淳風緬枝鹿人生豈長閒百年會有役黽趨王程盟心在幽獨
煩襟良已滌木川繞梁曲

題雷抱癡延竚二首

郡憲

崔應階

披圖見深山塵襟亦何淨白石與青松聊以悅吾性延竚何人斯
目夕多佳興倚杖聽鳴泉悠悠心不競

泠泠碧溪流，謾從松濤起。愛茲林壑幽，清風灑蘭芷。胸無一點塵，澄懷淡如水。信非塵世人，云是抱癡子。

畢卓池

前人

在天有酒星，在地有酒泉。天地生美祿，云胡無酒仙。我聞畢吏部，常拚酒爲年。放達無儀節，銜杯豈避賢。盜飲鄰家釀，醉倒甕底眠。不復知有我，束縛庸何愆。今我過池上，池水猶清漣。傳爲縱飲處，持螯泛酒船。空餘鵬頭綠，誰復遺甘鮮。一生未得了，落日鳴秋蟬。

秋日留別同事諸君子

六首

邑令 吳 溶

萬事如轉轂，流駒度隙陰。秋光澄四宇，大木多棲禽。眾禽巢南枝，一鳥向北林。久聚必乍散，嚶鳴羣和音。

簌簌秋風清，皎皎秋月明清。風吹我衣，明月照古琴。古琴能者彈，可以送遠人。清彈別離曲，見此良友情。良友不易得，遠人一沾襟。

沈隱居志 卷十九
倩彼明明月長照良友心

我有九畹蘭對之殊可悅不言而自芳譬彼同心結薰蕕不同器
何如蘭蕙潔昔紉以爲佩芬香四座徹素心正如此清韻似冰雪
今行陌上塵不與蘭同列香草自馥郁異日見蘭茁

陌上章臺柳道畔旗亭酒年年贈別離今日贈余手楊柳枝帶長
交易亦貴久此行在天涯此志在吾友關河雖暫隔金石自不朽
脉脉寓此情未識君知否

昔由大梁道驅車來古陳捧檄叱我馭往來爲勞人五色觀民風
僕僕車馬塵匏繫踰十年調篆移淮甯汲深慮短纒擔重慚負新
所倚同志友意氣比鵠鶴雷陳重膠漆脫畧真忘形慷慨見高義
然諾不近名相見每執手談嘯皆天真惟我最疎庸藥石賴規箴
方期共王事藉之慰平生一旦解余組仍將事遠行臨岐留鄙詞

叙此濶別情繾繾復繾繾耿耿銀河橫

平明擬整裝將作天涯客勞勞亭畔人指點王孫陌辛苦逐征塵
感懷在夙昔夙昔何所戀懷人秋水隔秋水猶在眼懷人不可聞
僕夫促我去去去朝烟白

蘇園靈芝歌

林華封

廣東人

天地有靈瑞山川和氣蒸明王秉至道萬國奏昇平嘉禾出無數
星聚河亦清家君守淮陽芝草祥復呈士民相踴躍歡覩來傾城
僉曰致有由太守清且明豈知國家祥爲臣亦有榮珠玉比其潤
珊瑚比其瑩置之欄檻前几席生芳馨勝彼河陽花珍同嘉階雲
報牒稱上瑞以之朝帝京本爲廟廊器豈可儕榛荆鴻隄施黃蓋
玉殿搖金英紫氣覆丹陛雙麟挺朱楹服之億萬年作歌聊樹慶

陳思王墓

汪思廻

見前

昔聞陳思王藏骨宛邱原七步詩其寂八斗寄囂喧悠悠二千歲
留此最高壻我來一往過萋萋藉草繁秋風吹落日野樹招旅魂
牧童三三五簷笠覆虎蹲牛背橫短笛踴躍舞墓門墓門云有碑
於今亦烏存只有前高臺絃歌出遠邨遊人相過從冠蓋集朱牖
可知三分謚不與十哲論嚼菘豆其地吾自愛吾園

陳州懷古

書院姚之瑗黃陂掌教

宋室銷兵權天下方積弱幽燕悍天驕巴蜀難繼作桓桓寇與張
西北恢雄畧澶淵振國威成都靖民瘼麀鼠讒孤注北門假鎖鑰
淮陽老尚書無事亦閒却西園卧治餘方食忽驚愕廟堂竄忠賢
慟哭氣憤礪彈指斥奸諛英風儼如昨孤鴛流芳亭矗立冷風閣
劍氣冲寒香精光時燦燦嘆息傳先生神龍不可捉

見錫召感懷詩作此勉之

前人

大化無停機雙丸如轉轂人生天地間百年亦迅速所以媚學人
情陰常不足甯使日出陽無爲賓炳爛董生帷常下陽城書竊讀
方思匿形影豈暇諧時俗今人喜類聚持躬厭拘束縱橫恣笑談
上下樂征逐快意方一往風流亦自目嬉戲既失時詩書不充腹
雖有聰慧資神智日消縮擾擾何所益此生終碌碌維子罕人事
神閒而氣穆鍵戶變深居終年書一篋我見感懷詩觀之常反覆
嘉爾介石操自足矢幽獨志趣既已殊凡鈍非所愿不見困知編
前賢用自勗

題趙忍齋贈君家傳後

吳其彥

昔聞李元綱叢編錄厚德閣行猶耳鳴聲聞標士則鼎鼎千百年
音塵遠未息從知風誼傳亦闕文字力趙君磊落人承家守忠實
灑灑逍遙公英英任俠客生長河洛間士衍性懇惻尺寸柄雖無

赴義形於色有嫁供釵銅有喪救匍匐有荒概釜鍾有罪脫微墨
恭敬維梓桑憎人樹藩棘抱璞五旬餘素履始終一雪白幽蘭薰
清芬難具述吁嗟薄俗移疇復敦狂卹惡者若墜淵愛者乃加勝
讓財古來稀君獨富仁術歛枯噓之生立扶仆者直道旁口碑流
淚墮百夫特何當愚頑砭盡解鄙瑣惑一行擬重書愧乏歐史筆

告老歸里留別于司馬曉峯

王 瓊

木葉何颼颼秋風吹不休風來吹我心吹向黃河流河流迅如駛
歸心不可止使君問歸人何時達鄉里良覲匪所期歛爾生別離
雲望故鄉處月來野店時時復見雁來兩地各徘徊賤子返河洛
君留畫卦臺邑乘待有日敦延董倚筆左馬俱奔走躡定當一一
言亦何能盡情亦何能射

叶

僕夫催我去去晚煙白

光武臺懷古

雷方曉

邑人
下同

豁達高祖同應運，戡多難，麥飯漚沱，河部曲引伏竄，反側與世安。
生民出塗炭，雲臺次功臣，勳名銘東漢，綿延二百年，奸雄恣悖叛。
龍戰大河南，城角衰草慢，今我一閒遊，荒村人影亂，斜陽登古隄，
回首發長嘆。

雜咏

前人

孤松立層岡，枝葉如虬龍，一朝聞天籟，萬壑生悲風，乃知窮室士，
吐氣自成虹，潛龍伏深淵，威鳳棲高桐，會應以時舉，悠悠霄漢中，
雪中攜酒訪梅留，贈杜棘山索和 前人

彤雲暗江干，大地變倏忽，出門望茫茫，幽人孤興發，攜酒就東鄰，
欲醉梅花雪，梅韻鬪清香，雪花團香魄，徒倚雪梅間，浮杯成雙白，
去矣梅主人，和我須君索。

上太守拙圖崔公祖十首

以淮陽股肱守高
尚猶在茲爲韻

錢廷文

郭清自名閔榮戟著助堦我公纂素業風度一何佳澄清乃夙志
誓欲掃昏霾卓哉二千石英聲遍汝淮

中原一都會從古說淮陽公來敷雅化千里靜封疆往者宦遊地
歷歷生輝光汾河及汝水遺愛詠甘棠

城色拱羲陵穹崇鬱終古抗志千載前流輩焉足數召杜亦何人
先民有遺矩羣黎爾何知嬰兒在掌股

華宗左補闕曾作陋室銘流風猶未沫雅意若懷冰鳩鳥巢廳事
蔬水與曲肱誰能匹芳躅昔之任吳興

清朝多儁材豈乏良牧守所慮龔黃儻文藻不兼有以觀拙圃集
雲夢吞八九家世禪雕龍斯語良不苟

後漢書崔駰傳贊崔
爲文宗世禪雕龍

山川鍾靈異綺歲耽風騷雖復分虎竹志不在金貂有時得佳句
興與秋月高公庭多墊趣瀟灑真人豪

末學蠹膚爰端居少切磋譬彼含風蟬孤吟誰與和詎料蓬蒿園
得見軒車過慚非徐孺子一榻容幽臥

縹緲黃鶴樓泱泱鸚鵡洲湖山佳麗地風月何夷猶白雲凝望眼
鄉思浩悠悠且爲蒼生計功成績盛游

詞翰非一塗升降惟時代浩浩百川流要有真源在頗怪說詩家
齟齬分宗派迷方欲何從望公一篤誨

賢豪不世出必爲明時白鹿來車下主簿已前知自分鶴駕巢
蓬隔鳳凰池扶風施絳帳願得及今茲

擬古六首

前人

嘉樹植東南枝葉何森森其下滋芳草其上巢文禽炎風歛以至
爲君散清陰時哉非隆暑斤斧日相尋弱草何足惜孤鳥流哀音
雄雌一驚飛側促念故林願君感此意鑒我平生心

清翠來何方輕舉離炎洲所棲一不慎見欺于鵝鷓凡鳥如珍禽
文彩處鸞仇四望三珠樹海路良悠悠何當隨紫鳳日夕巢丹邱
驅馬遊梁宋蹇裳渡淇河行行千餘里雨雪何其多故人在燕南
十載不輕過相見一長揖醜酒其高歌幽并多俠士少年今如何
腰間寶劍懸一日幾摩挲

終南何所有陰崖產修竹漁子作文竿垂釣清溪曲大魚自喞喞
小魚更蹙蹙孤幹託遼岑胡爲殄水族我聞製簫管伶倫採嶰谷
吹之宗廟中清音何肅肅所遭既不齊一物分榮辱位置倘非才
不如一朽木

謂天蓋可升鬱蒼瀾布獲抗手陟瓊霄蟻蠓浮高步倏而閭闔開
恍與神人遇廣樂奏鈞天彷彿辨韶濩縹緲見金闕夔標鳳翥翥
碧落拜侍郎謂余一何誤蓬蒿是舊鄉未可忘其故思欲憑歸雲

渺渺降天路

蘭蔭竟不榮
荃蕙化爲薪
夔然蔽白日
徑路多荆榛
豺虎竄其間
遊子恒苦辛
豈無千金劍
欲往還逡巡
惡草本自生
猛獸未易馴
對之一長嘆
行矣全吾身

登蘇亭

張子儀

三月天色麗
湖清雲初霽
春光取次看
且漫開青睞
岸上桃李花
花下新草細
一聲長歌來
狂吟思鼓柁
隱隱蘇子亭
藹藹晴煙曠
當年讀書臺
寂歷門常閉
憑眺一水間
默默感興替
六橋故依然
眉山草木敝
勝地亦何常
盛衰安足計
我爲造物不
羈人神遊于
載心所契焉
得穎濱老與
我說此際

畫卦臺懷古

陶克成

臺著畫卦名
荒涼餘蓋瓦
不見羲皇人
何處覓龍馬
秘奧昔聖闡

贊云過可窺尊編已三絕猶願數年假道至察天地約之不盈把
榻來登臨客誰是知音者

汲長孺墓

楊立志 見前

直言不容世由來非一朝長孺云暫屈何曾復見招一登淮陽路
千載諫骨凋倔僵難爲黨遺墓亦蕭條舉俗嘉容悅懷慙慘不驕
卧閣一回首薄暮竚鬱陶

憂蝗

劉俊德

丁巳季夏初飛蝗蔽天至飛聲如驟雨白羽如雪碎身小不盈寸
羣飛皆成隊飛入田禾間滇粵皆憔悴坐使懷新苗穎粟均已墜
坐使家家倉未由實空匱農人隴上哭米麥條驟貴我聞亦大痛
蒼天何不惠去年蝗飛來前方已甘罪饑饉兵火餘楊腹遭顛沛
甚者鬻子女輕者欠官稅安分受飢阻無人生惡意減膳奉高堂

餓死恥盜竊靜待麥秋來好作重生計麥收復不多已其沐天賜
幸哉天心仁將我羣生實敢言年不豐亦庶可少恃胡然慶未豐
忽使羣生泣飛蝗依舊來種子復滿地蝗飽有時飛蝗子無志去
初生纔如蠅已作眈眈勢盡食無才遺騰躍引朋儕驅之不肯去
撻之不知畏意非盡我禾決無肯輕離悠悠呼昊天此邦獨何罪
天心仁萬民忍洒家家淚此邦素節儉忠厚少詐僞耕耘爭相先
糠粃莫委棄百年無顯者誰干天戾氣將謂守令汚我公亦良吏
卽云有罪罟去年禮亦被殺之不一殺生者餘幾輩但願天矜憐
愚蒙已困憊改行安處善永無干罪戾天心仁我人忍使無憐類

觀爭回

孫舉海

見前

旱魃何太虐稼穡如燒枯阿兄方啼飢胥吏頻追呼入城典賣粉
爲兄代納租急行常恐後見人爭杵回此稱餓就槁食待榆葉搗

彼稱餓堪嗟待春萋萋芽各因飢腸鳴誰能解其爭忽見催租吏
飛散如鳥驚

七言古

勸酒惜別

宋張詠

春日遲遲輾碧空綠楊紅杏描春色人生年少不再來莫把青春
枉拋擲思之可不令人驚中有萬恨千愁并今日就花始暢飲座
中行客酸離情我欲爲君舞長劍劍歌苦悲人苦厭我欲爲君彈
瑤琴淳風死去無回心不如轉海爲飲花爲嵬贏取青春片時樂
明朝匹馬嘶春風洛陽花發胭脂紅車馳馬走狂似沸家家帳幙
臨晴空天子盛明君正少勿恨功名苦不早富貴有時偷閑強懽
笑莫與離憂賈生老

八月十日夜看月有懷子由并東崔度賢良

蘇軾

見明

宛邱先生自不飽更笑老崔窮百巧一更相過三更歸古栢陰中
看參鼎去年舉君苜蓿盤夜傾闔酒赤如丹今年還看去年月露
冷還知范叔寒典衣自種一頃豆那知積雨生科斗歸來四壁草
蟲鳴不如王江長飲酒

戲弟子由

前人

宛邱先生長加邱宛邱學舍小如舟常時低頭誦經史忽然欠伸
屋打頭斜風吹帷雨注面先生不愧傍人羞任從飽死笑方朔肯
爲甬立求秦儂眼前勃磈何足道處置六鑿須天遊讀書萬卷不
讀律致君堯舜終無術勸農冠蓋鬧如雲送老鹽齏甘似蜜門前
萬事不掛眼頭雖長低氣不屈餘杭別駕無功勞畫堂五丈容旂
旄重樓跨空甬聲遠屋多人少風騷騷平生所慙今不恥坐對癡
氓更鞭箠道逢陽虎呼與言心知其非口諾唯居高忘下真何益

氣節消縮今無幾文章小技安足程先生別駕舊齊名如今衰老
俱無用付與時人分重輕

次韻子由柳湖感物

前人

憶昔子美在東屯數間茅屋蒼山根嘲吟草木調蠻獠欲與麋鳥
爭啾噓子今憔悴眾所棄驅馬獨出無往還惟有柳湖萬株柳清
陰與子共朝昏胡爲譏評不少借生意凌挫難爲繁柳雖無言不
解慍世俗乍見應慙然嬌姿其變春濯濯豈問空腹修虵蟠朝看
濃翠傲炎赫夜變疎影搖清圓風翻雪陣春絮亂蠶響啄木秋聲
墜四時盛衰各有態搖落悽愴驚寒温南山孤松積雲底抱凍不
死誰復賢

次韻子瞻見寄

蘇轍

我將西歸老故邱長江欲濟無行舟宦遊已如馬爰輒衰病歸

龜藏頭三年學舍百不與糜費廩粟常慚羞矯時自信力不足從
政敢謂學已優閉門却掃誰與語書夢時作鈞天遊自從西方多
法律深山更深逃無術眾人奔走我獨閑何異端居割蜂蜜懷安
已久心自知彈劾未至理先屈餘杭軍府百事勞經年未見持干
旄賈生作傳無村事屈平憂世多離騷煩刑弊法非公恥鴛鴦奔
車忌鞭箠藐藐何自聽諄諄諤未必賢唯唯求田問舍古所非
荒畦弊宅今餘幾出從王事當有程去須臾肉嫌無名掃除百憂
惟有酒未退聊取身心輕

次韻子瞻對月見憶並簡崔度

前人

先師客陳未嘗飽弟子於今敢言巧敗墻破屋秋雨多夜視陰精
過畢昂蓋鹽冷落空盃盤且依道士修還丹丹田發火五臟暖未
補漫漫長夜寒我生疲篤戀莖豆崔翁遊邊指北斗唯有玉江亦

未歸閉門無客邀沽酒

農家祠

張耒

南風霏霏麥花落豆田漠漠初垂角山邊夜半一犁雨田父高歌
待收穫雨多蕭蕭蠶簇寒蠶婦低眉憂繭單人生多求復多怨天
公供爾良獨難

再寄子山先生

前人

宛邱之別今五年汴上留連纔一日賤生飄泊客東南憂患侵陵
心若失先生神貌獨宛然但覺巖巖瘦而實有如霜露入秋山掃
除繁蔚峯巒出自言近讀養生書頗學仙人餌芝朮披尋圖訣得
茯苓云是松間千歲物屑而爲食可不饑功成在外非倉卒上伴
金石免毒裂下比草木爲強峴涓涓漱納白玉津鍊以真元納之
骨神仙自是人不知豈爲難求廢其術我聞公說心獨嗟欲問太

虛弱恍惚奈何不使被金朱乃俾枯槁思巖窟又觀世事不可常
倚伏誰能定於一終身軒冕亦何賴况有朝升而暮黜何如端坐
養形骸壽考康寧無天屈乃知豈即非良圖却笑兒曹嗜糠粃青
衫弟子皆受經賦分羈窮少倫匹自知無命作公卿頗亦有心窮
老佛但思飽暖願即已妄意努苦心實不終期策杖從公游更乞
靈丸救衰疾

女几詞下

前人

山邊白雲閑不掃山下松花籠甲老東風古栢吹暖香廟前三馬
荒春草朝霞爲裳水爲佩守廟千年老龍在清風掃堂神暮還山
頭月出溪潺潺

宛邱嘆

元
元好問

秦陽陂頭人迹絕荻花茫茫白如雪當年萬家河朔來畫出牛頭

九租帖蒼髯長官錯料事下考大笑陽城拙至今三老背腫青死
爲逋懸出膏血君不見劉君宰葉海內稱饑摩寒拊哀孤惻碑前
千人萬人泣父老夢見如平生冰霜紈絺渠有策如我碌碌當何
成荒田滿眼人得耕詔書已復三年征早晚林間見雞犬一犁春
雨麥青青

柳湖春晚

明王詠

柳湖湖心一塊土竦然特出方如矩中有亭榭甚窳窳簷牙闌角
臨水滸四面瑩然一鑑空亭臺倒影色濛濛登臨一望天光淨恍
疑身在水晶宮幽閒更無車馬迹喧囂不到塵寰隔卓哉蘇子居
聲價常奕奕屹然登岩岑杳然隱深林可以豁我目可以清我心
梧桐月可邀楊柳風可引閑來欵欵步虛階一段風光看不盡亭
之水涇涇浩浩清無底可洗耳兮可濯纓浮天載地蛟龍起亭之

蓮花如雲錦藕如船不染泥兮不蔓枝霞標玉冠常鮮妍亭之柳
遊絲飛絮榮春首帶雨含烟舞翠腰長亭謾送離人手亭之魚鼓
鬣揚鬢任卷舒或在蒲兮或在藻春雷一鼓飛太虛無邊景物望
中旋美人乘興日相逐壁間琳瑯紀珠璣樽俎錯陳盞水陸君不
見江陵一柱觀錦里百花潭赤壁東坡遊曲江子美酣人以地面
聚地以人而傳子由逸興久已矣至今亭樹常悠然

風雪吟爲張栢村還陳賦

劉錫

北風何栗烈吹成如掌雪征人駟馬車岐路悵言別伊昔鶯花媚
曉天晴效芳草匝芊芊絃歌共歎子游嫩桃李仍忻潘岳賢明珠
夜投擬知已按劍道傍胡爲爾瑤琴只奏山水音也知難入時人
耳撫衣歸去舊草堂當年邱壑饒輝光最宜珠照良宵迥兼稱琴
彈春晝長觀君談笑莫分手浮雲世事無何有勸君且於醉顏醄

滄陽縣志 卷十九
試聽陽關古調歌它時鴻雁南風起無惜平安寄信過

陳州李方集河防篇

劉思溫 邑人

有土彈丸宛邱西河環瀾迺集羣黎不禁霖雨連三日大浸直與
滄溟齊尋常一決數千里少壯流離老稚死殍斃予遺何爲生爨
兮析骸食易子嘗憶歲當癸己前河流瀕洞波翻天田禾飄沒廬
舍圯莽然一望絕人烟哀哉三載民無祿願得賢良一修築誰視
民溺由已溺長跪白波吞聲哭幸有東州楊賢守祝天叩地斬長
久親督畚鍤舍郊原至今碑勒生民口嗣是數載獲安豐桑麻滿
地扇和風縱有崩缺廢壞時豈補尙賴廵守功愚氓竟恃堤長堅
凌夷不顧漸薄單燕雀處堂幸無事忽然意外變更端疇昔威令
值壬子陰星正照豫南里注洧潁沙水交濛茫茫一帶無涯淚說
者謂觸蒼龍怒長驅不管馮夷如飛流直突下龍門涵雲吞日浸

天霧濤聲震地復驚天象跡龍形聲

支

文

萬民力與河伯敵奔騰

澎湃勢難全午夜一決如洩海可憐閭里川原改鬼戕樓閣變成淵
賦韻邱墳爲水滙初聞如同萬馬馳悲鳴怒咤聲絕竒再聽有如
如三軍亂相呼相應競紛披側耳徘徊一靜聽始知溺兒逐潰涇
欲沉又恐葬魚腹欲飛爭柰無羽翎飄泊或求高原止勢危或冀
得舟子高原舟子兩難逢須臾竟逐東流已我亦倉皇看吾閭蛙
生沉竈釜遊魚便呼小艇脫昏墊茅簷頽壁已無餘木杪倒掛禾
稷黍大舟入市通無阻邗堪珠米桂爲薪欲訴此情多齟齬萬姓
嗷嗷且半年積苦含愁誰見憐否已極兮泰將來此情始達梁公
前卓哉仁明梁公祖素念民艱同已苦一聞控訴泣潛然委催役
夫急塞堵况是灘衝勢不小大者溝澮小池沼淤底坎穽勢不平
計程量日局難了天意亦爲愛蒼生四百羸夫號竒兵鼓舞懽呼

齊助力鋪杵聲喧神鬼驚此集長堤忽礙斗令人蒿目周家口委
土三尺稚復虛勢當水會安能久俄然陰沴又爲督相看崩潰只
目前適有慈祥湯太守新驅五馬來日邊衝波蹈水拯民殍暴牲
陳詞祈彼蒼耿耿精誠回天日馮夷遠遁蛟龍藏日夜兼築勢幾
窮霎時叠障倚崆峒阨危狂瀾轉靜波太守不自以爲功長堤遠
巨勢綿延仁人厚恩覆如天可能相繼還如此永固河防億萬年
清

黃河哀

睢陳
道憲蔡含靈

我聞黃河之水天上來奔濤萬里潤八垓天心仁覆無窮已河亦
應與同惻哀云胡弗順厥有常忍使億萬遺黎並沴災今年幾長
堤明年幾壩臺堤兮壩兮不能神運而鬼致坐令中州膏血糜汙
萊東風未解長河凍羽檄飛下鳩徒衆里胥持籌任多寡潛移暗

長官如夢縱橫三五吏到門舍南舍北紛騷動糶穀賣絲勉支吾
哀此惻獨靡所控自言有子十七八前歲充丁堪負重匆匆勾攝
赴河干鞭箠又復遭毒痛誰知河下專役人蜀丁徒手竟何用河
署高鎖吏人閒河夫相對蹙愁顏某也有母病癰腫若復無妻兒
女孱須臾縣吏瞋目至兩稅星急爾胡頑一身百孔難填濟終歲
豐獲食乃艱此日君門真萬里此時民命真草菅我聞古來河以
不治治末季春春滋多事漢家沉璧蓋喜功賈魯黃陵兆禍異以
茲金錢充振蠲上下君民各攸宜胡爲乎年年事築塞貪吏因緣
爲奸利河兮河兮我有斗酒爲君酌胡不上順天下比地龍門礪
石共安瀾八百郡邑休殘力

撲蝻行

邑令

何登楛

去年豫省水突至五十州縣無乾地今年蝻子何處無眼看頃刻

披軟翅農家二麥佈黃雲終日撲蝻隨官吏跳脫羣遊不畏人撲
急且作飛飛勢千夫百夫等圍場炎蒸饑渴忘疲瘁南北東西盡
兒孫欲窮爾類誠非易我聞在昔良吏多蝗不入境虎渡河

孝義謨題雷梅隱傳後

前人

沙河水流東復東沙堤露柱石玲瓏高標孝義主恩渥大書梅隱
橫長虹我來吏淮公不見購書得覩孝義傳贈言詩句滿琳瑯王
公紳士皆題徧公有季君曰抱癡對我縱橫與談詩虎頭燕頰近
游俠充腹白蟬發英姿桑梓任卹罔所吝交遊意氣襟開披邇時
登堂棟暈飛諸子循循隨指揮問君夙昔何稟承自言庭訓不敢
違噫嘻抱癡乃如此公之爲人可知已

逸園雅集

龔廸經

達人遺世尋真樂渺觀萬物志冥冥不隨名利涉風塵心逸神安

托巖壑潁川之秀河岳鍾人物英奇自不同洛陽名裔高芳躅山
林泉石羅胸中我從鴻溝始識韓風流文采如芝蘭引我園居一
盤礴恍然身際嵩峯端三徑逶迤通畧約曲廊窈窕翻花藥嗟峨
怪石矗烟霄靈鯨突兀凌樓閣玉立亭亭喜白松磊砢鐵幹如虬
龍卓然高枝異衆卉蒼翠不移夏與冬時值中秋月如練皎潔清
光疑一片主人好客置芳醪梨園絲竹娛高晏歡歌妙舞欲忘眠
邀賭霞杯不知倦吾聞卧遊宗少文但知披圖絕世紛又聞米顛
見石拜未向音律張三軍幽人韻事成雙美移我形素丹崖裏輞
川幽致不足云金谷光華寧過此江南名勝且莫誇甕裏醯雞井
底蛙未覩蓬閣之烟霞君不見辟疆主人豪且賢至今猶頌真神
仙不容中令傲岸多留連胡爲乎君獨繾綣情無邊慚無妙句如
青蓮爲君進酒歌瑤篇

蘇子由讀書亭

姚之瓊

蘇子策論傳龍虎眉山嵩嶽相吞吐熙寧宰相氣方盛斂鋒養晦
辭洛上柳湖臺畔夜雲平湖光掩映素魄清對床高談兄及弟抑
塞磊落誰爲鳴天津橋上杜鵑血化作宛邱讀書聲古人安往不
復見水中矗立層臺孤當時意氣已消盡何乃齷齪悲遺墟

汲公墓

蔣曰綸

哀鴻紛紛叫四野牧豎行歌古塚下殘碣剝落屬何人拂拭摩挲
苔盈把漢家天子選賢良老臣受印撫名疆七年治術惟高卧一
卷黃老枕中藏當時太史記梗概清靜無爲除苛碎父老愛我奉
蒸嘗三尺孤墳屹然在公名永並淮陽存孺心莫望九卿尊丞相
御史不足數茂陵秋草亦荒原請看此日太守宅豐閣長留粉署
側自注卧閣故址在今郡署內野人時復躋公堂手指舊碑口嘖嘖近來吏職

稱頗難強半勞神簿領間竊疑民情今非古玉律金條未可刪君
不見前歲流亡載道路悲風颯颯愁日暮冥漠如聞太息聲依稀
聲在甘棠樹

叢雲閣晚眺

段鏢

日暮遊人遊不已笙歌響答沸秋水修盧緝柳解廻風沈鯉潛蛟
應側耳酒酣乘興上高邱微香四散綠荷洲無限平湖好風景烟
波誰作釣徒收

絃歌臺

汪恩廻

宛邱城西阨臺起阨臺四面平湖水水面平臺臺欲低參差檜栢
千霄裏當日絕糧糧絕無尼山自古而無死笑殺與謀諸大夫徒
兵不解將何俟曠野依稀吾道非何爲於此匪虎兕君子窮乎亦
固然絃歌慷慨良有以以此絃歌直到今爭說徒兵爲天使天使

聖域廠賢關阨臺老作竊歌址振興文教今其始

陳州行

書院于大猷江

尚學教

南

崇禎壬午之三月陳州蚩尤布城闕闖賊十萬西南來豹狼遍野
在倏忽是時中原已鼎沸大河以南無生氣將軍遇賊多踉蹌

左良

玉遇賊敗於朱仙鎮

不聞舊壁魏無忌監司關公方備兵堅壁清野守州城

城中甲冑額無幾選了擇壯無全營紳士軍民四門守其日上旬
值初九登陴發炮轟如雷殺賊橫尸積如阜更越二日賊誘降飛
書一紙懸城椿關公裂之誓於眾忠肝義膽血盈腔高懸金帛酬
勇義背城再戰殲賊騎城頭刁斗桴鼓鳴懸數晝夜無失利維時
回民號清真陳州回民穆進京率其徒三百人號清真營奮勇殺賊手持白旌健絕倫結徒
歃盟願效死奮臂一擊不顧身更有裨將白傳芳父子血戰刀如
霜開關角敵鬪鋒鏑賊徒辟易皆倉皇逆闖積忿忽舞智伏兵

東掩旗幟誘之入伏巨砲燃一朝父子死王事關公賴有清真留

閉門堅守方借籌十有二日城南火城東南砲藥災事出倉猝非人謀醜

類乘之盡登躡回民巷戰被屠刳關公髭裂殉危城霹靂空中賊

震情賊手提公首指論忽空中一霹靂乃棄去殺氣冲奔梟鳥啼四門屠戮肉成泥是

時州守侯公殉剝面剝皮倍慘懷衣冠腰領通衢塞白茫茫日

無色鬼火宵明大市旁腥雲晝起東門穴聞說前明祚不延九州

擾攘盡烽煙濯龍門外啼鵲血豈獨陳州絕可憐

咏董烈女

王新楨太康翰林

君不見淮陽城外蕭蕭幾株白楊樹哀烏雙棲啼早暮說是始平

公子江都貞女合窆之邱墓憶昔貞女早失怙有母待奉弟待撫

心力交瘁十餘年二月天桃詩將譜忽然一夕噩耗傳郎先羽化

身無主身無主兮心愈堅暗吞黃金歸黃土穀則異室死同穴精

魂耿耿著貞烈豈是天地鍾毓私丈夫何偏出巾幗採風定來轡
軒使專章馳奏達天子綸音旌表光閭里遂使一樹女貞枝萬古
常青心不死

咏龐理黼聘室董貞女

咸寧
訓導黃元昕

綱常甚大寔區隘義重如山生如芥忠臣孝子與貞媛摺拄乾坤
纔不壞董家有女字名門天性生來靜肅溫下帷江都勤訓誨德
公後嗣附爲婚天公摧折女貞子霜欺雪虐交相擠一夜罡風吹
海枯昌黎太息董傳死訃音倉猝報紛紛烈女雖聞若不聞陽承
歡笑如平日私洗鉛華易素纈黃昏點點恁收次傷心痛灑辭親
淚捐生全義未全恩視死如歸亦如寄生金一片最精堅慷慨如
吞雪與氈月落星沉雲慘淡神欽鬼敬史流傳世間節孝原常有
生感同衾死獨守惟此初無覲面情但知名義真難負君不見

來嶺嶠肆鯢鯨沿海紳民盡請纓夙昔未沾升斗祿艱危羣起社
鄉兵往往捐軀報國取義而舍生吁嗟乎斯誠取義而舍生

遊綠野堂

陳郡有大王廟廟後有綠野堂呂仙亭小蓬萊極幽勝

朱炎昭

鹿邑人

義陵一坏土高絕幾萬古阨臺一聲絃響流數千年探幽更出宛
邱西古木參天黛色迷一點紅塵飛不到隔墻時聞竹雞啼我來
忽向禪關叫松庵老僧喜客到把臂飛上小蓬萊臨風劃然發長
嘯此時頓覺督懷開煙雲供養眼福來鳥語花香大歡喜拳山勺
水小徘徊望古遙集已茫茫對景懷人憶有唐晉公去矣留綠野
呂祖仙乎夢黃糧噫嘻乎人生在世休草草勲業神仙兩都好莫
教流爲没字碑名山無恙人空老

逸園賞牡丹歌

萬如洛

以下邑人

牡丹昔聞盛洛中花品遠過延州紅雙桂樓中春色麗細書遍滿

小屏風又聞南湖張功甫別營穠華開花墅當時爭說牡丹會香
發簾開見歌舞我嘗策馬洛陽城春風十里尋紅英欲求一本那
可得野圃青青麥菜生目中所見已如此王孫遺跡想然耳固知
物產有轉移託根得所便爲美近聞品類曹南佳譙城亦復多好
花計程祇隔三百里花時不得醉流霞逸園主人雅好事池臺亭
榭紛難記門外活水流潺湲門內假山好位置百花開盡到花王
佳名歐碧與姚黃麗日橫陳明步障香風低度隱迴廊主人好花
兼好客折柬相邀浮太白留春已盡日中杯卜夜復移花下席兩
行銀燭吐青煙一部清商奏管絃酒間各許徵雅事笑談主客意
歡然猶憶去年柳湖路綠漲平橋舟徑渡主人揖客高館開牡丹
花放琴樽布同遊諸子皆清才醉劈鸞牋麗句裁意中好事難忘
得雅集那知復此同清漏城頭聽已久漸看東月來高柳沉澗清

盡酒千鍾敏捷吟成詩幾首短調長歌縱復橫
新詞鐫就枝頭擎
欲援玉照梅品第爲君重置花籠榮

古意

錢廷文

昔年相識淮陰市我買山田君販履今年相遇石頭城
君騎官馬我徒行聞君已售金門策鳴珂飛蓋何烜赫
十年不見朱翁子誰知早是青雲客故林幸有一枝巢
何用簪纓意氣驕不欲自稱門下士同人顏色非吾曹
達官雖是同袍友安貧未敢求升斗何況巍巍七貴門
請謁先愁闈者尊脂韋便辟紛無數生死誰蒙國士
恩歸來且誦閒居賦夢中不到城南路

贈張惕存太朴

前人

少年結交多倉卒且爲金石暮秦越曩昔同心一二人
蠅營狗苟時攻訐張子拓落真吾曹平生踪跡多漁樵
有時獨立孤松下惟

聞長嘯驚蓬蒿
家棟宇屹相向
咫尺高墉若屏障
鄉里誰知重
腐儒雞犬亦自識
窮巷與我清語忘
朝饑軒然一笑人
不知霜風
昨夜吹虛幌
秋水今朝漲
汚池丈夫骯髒
自千古世上悠悠
安足
數
蔣詡掃逕待羊求
應璩將書問劉杜
我病君愁其苦辛
出門何
處少埃塵
異時倘作山中客
莫忘錢家是舊鄰

歲大饑

孫舉海

見前

終歲望雲氣吐霓
赤地尤甚北與西
杼柚盡空室皆罄
食賴樹根
與蒺藜二者倏忽
亦何有官府無策
輒束手翁媪鬻女
夫鬻婦各
地曉諭禁攔阻
愚民信此爲生路
道賣一口活數口
婦朝拋故夫
暮宿傍狸狐
吞聲忍辱含垢
汗女暮棄翁媪
朝行隨豺狼
逢人羞
顏縮首藏君不見
自古歲有荒
全活災黎豈無方
君不見人生皆
有死何令緩死
須與徒喪恥
餓死事小
失節大况使節
失餓未已

中有待斃求得正強哉庶乎稱受命流亡東南知多少鳩形反續
安巢鳥我邑災雖未若河洛南北太行東西極而已萬民飢色四
野盈餓殍吁嗟乎方聽飛鴻嗷嗷聲哀哀歟聞索租咆哮胥吏來

行路難

前人

行路難難於上青天一條古路鄒魯邊鄒魯已是路盡頭遙遙何
止里萬千欲覓去路伊何處濂洛關鍵迤邐連濂溪定靜止水似
光明皎皎月印川河洛永清不揚波篙師主敬泛輕船關中堂奧
是安宅出入禮門在所先建安大道平如砥古路賴由此路緣日
邁月征著脚穩慎毋錯步到青田青田捷徑羊腸險蠶叢崎嶇崑
崙巔建安之後有懷孟懷孟之道大而正此去問津渡河津津
遙接泗水濱恐誤迷津入姚江姚江幾若水之澤洪水湯湯湧波
濤風雨蕩漾簸小艘噫吁艱哉行路難大道蕩蕩在餘千餘下之

道平且直行無聲障與層巒近與相接有桐鄉其道平平是周行
既無偏兮且無陂去去直登洛閭堂伊邇平湖湖水平好風送帆
舟楫輕淵源洙泗滙濂洛玉壺水鑑徹底清竊幸吾鄉有儀封儀
封路上有定程擔重直前須勇往無歇脚處日日行行路難多岐
路旁蹊小徑荆棘獲半途而廢亦徒勞行彼周道難止步

貞女行

嚴汝誠舉人

竹菊蕭疎傲霜雪松柏蒼翠經磨折更有正氣鍾兩間男子聖賢
女貞烈崇祠頒詔祀春秋國朝重孝兼重節每聞烈女幾迴腸欲
言未言聲嗚咽董家有女廿二春幼遵姆訓識綏倫十歲許字龐
家婦桃夭未賦葉蓁蓁報到龐生染病亡貞女聞之淚千行日落
西風侵珠箔天寒暮雨灑瀟湘姑家母家多兄弟俱能菽水奉高
堂貞女平時重節義縱然舍生誓不二吞金赴節人不知夜半寤

婺歸星次古來多少奇男子以身殉國同生死巾幗居然有鬚眉
貞女皎皎光青史亦有存亡與其論始激清議終唯唯偷生旦夕
竟若何有玷冠裳負朱紫若使斯人尙有知九泉聞之愧無比節
孝淮陽列滿祠不如貞女節更奇以誠動人人俱動巷祝戶歌無
異詞予亦潸然泣如雨感君貞節強成詩寫懷不暇計工拙字多
顛倒句參差貞女素志勵堅冰貞女丹心同皦日婦隨夫死已千
秋死則同穴生異室爭問何處招靈魂楓葉霜林秋瑟瑟

五言律

宿淮陽

唐張九齡

日暮荒亭上悠悠旅思多故鄉臨桂水今夜渺星河暗草霜華發
空庭雁影過興來誰與晤勞者自爲歌

故陳州刺史贈兵部尙書韋公挽詞

孫逖

奕葉金章貴連枝鼎位尊
庭爲鳳穴相府是鵠原
世閱空悲命泉幽不返魂
惟餘漢臣史繼述贊章門

曉發淮陽

張繼

微涼楓葉下楚俗轉清閑
侯館臨秋水郊扉掩暮山
月明朝漸滿露溼雁初還
浮客了無定萍流淮海間

送宛邱任少府

盧綸

帶綬別鄉親東爲千里人
俗訛唯競祭地古不留春
野戍雲藏火軍城樹擁塵
少年何所重才子又清貧

淮陽路

李商隱

荒村倚廢營投宿旅魂驚
斷雁高仍急寒溪曉更清
昔年嘗聚盜此日頗分兵
猜貳誰先致三朝事始平

郡齋書情寄仙遊張及

宋張詠

老去慵仍甚，榮名舊日疎。又因經歲病，不答故人書。閉閣僧歸後，看山吏散初。何因論心跡，之子最相于。

初到陳州二首

蘇轍

謀拙身無向，歸田久未成。來陳爲懶計，傳道愧虛名。俎豆終難合，詩書強欲明。斯文吾已試，深恐誤諸生。久愛閒居樂，茲行恐遂不上官。客碌碌飽食，更悠悠枕畔書成癖。湖邊柳散愁，疎慵愧韓子。文字化潮州。

贈李簡夫秋園

前人

秋色豈相負，小園仍有花。遶欄吟落日，拾徑得殘葩。菊細初藏蝶，桐疎不底鴉。遊觀須作意，霜雪僅留槎。

挽李簡夫二首

前人

老成渾欲盡，弔客一潸然。遺事人人記，清詩句句傳。掛冠疏傅早。

樂事曰公賢歎息風流在埋文得細鏹

歸隱淮陽市遨遊十六年養生能澹泊愛客故留連傾蓋知心晚
論詩卧病前襟光塵滿榻無復聽談禪

和弟子由初到陳州二首

蘇軾

道喪雖云久吾猶及老成如今各衰晚那更治刑名懶惰便擗散
疎狂託聖明阿奴須碌碌門戶要全生

舊隱三年別杉松好在不吾今尙眷眷此意恐悠悠閉戶時尋夢
無人可說愁還來送別處雙淚寄南州

至安化驛先寄淮陽故人

張耒

蕭條安化驛倦客思悠哉積水連天濶青山送客來疎籬風捲葉
敗屋雨生苔寄語淮陽舊人今放逐回

柳湖春曉二首

明吳國倫

飛蓋出林垌浮香十里汀却移花外舫來醉水心亭返照荷爭碧
迴波岸轉青相傳蘇仲子寂寞此談經

桑落夙懷減蘇亭野興長釣磯堪繫纜席地可流觴柳拂溪橋翠
荷開水榭香踟躕歸未愜落日鬢蒼蒼

前題

王韋

曾聞湖水勝最是采蓮時萍跡原無定花神似有期滄波浮夕鳥
故柳發新枝風景能耽客徘徊一艇移

送鄭叔昭歸葬

盧黜邑人下同

鄭子歸鄉里家山入夢思親朋千里恨喪亂百年悲把袂情傷臆
臨風酒滿卮先塋崇祀罷莫惜寄新詩

題節婦蘇氏

焦竑

粉暗辭羅綺釵寒失鳳凰賦堪悲暮日心欲結秋霜烈女班荀並

男兒嬰杵行綸音一褒錫千載播芬芳

狄青墓

侯恪

驅馬平原墓荒墳土一堆名猶存日月身已暗蒿萊細雨牛歸牧
愁雲雁過哀躊躇懷古意欲去更徘徊

清

卧治閣

郡憲 崔應階

爲惜君名重雙旌出帝鄉將軍稱揖客天子肅冠裳治郡惟清靜
知人得贊襄不才難卧閣甯敢薄淮陽

太昊陵

前人

一畫開天後鴻濛始劃然六書宗義理大德合坤乾制作垂先覺
文明啟後賢宛邱留聖蹟瞻拜寸心虔

蘇湖亭

州牧 王清彥

先生湖上教一鑑啟城西舊有生徒樂新招伯仲題天光亭外撼
樹色望中迷私淑於茲者振衣步欲齊

蘇湖秋泛

舉人莫爾淮恩平

爲愛清秋意扁舟出野塘白雲留曲徑綠水繞廻廊送客風干樹
留人月一航當年蘇學士於此幾徜徉

淮甯被水查振

邑令何登棟

農父遷漁業秋田把釣竿茅房窄小艇老樹立危灘陰雨干波遠
蒸民一粒難乘槎斗牛近悲思動星寒

逸園雅集

二首

項城鈕秀

三至陳侯地名園得屢過密林移日緩虛閣受風多果重垂簷樹
香遙隔岸荷倚然生虛夢疑此卽槃阿

徑轉通平野門開對遠汀卧藤搖獨樹立石傍方庭鳥語因風變

花光得雨醒林塘同勝絕近有潁濱亭

前題

張志遠

隣居饒樂事笑傲足忘年樹密能留月臺高不得天
卧雲隨返照
選石聽飛泉爲愛西園勝時來潁水邊

前題

李鎬

爲愛逸園好橋門綠水環迴廊隨樹隱曲逕看花閒
紫燕穿紅雨
沙鷗點碧彎
尋幽莫向蜀此地即眉山

蘇湖秋泛

吳清文

欲覓清華色蘇堤泛棹游
雲霞千里目萑葦一天秋
地接司城閣
風迴太始樓
平湖開一鑑滌盡古今愁

卧治閣

百齡

卧治傳高閣清風憶漢臣
立朝矜懃直行部式尊親德共思
何武

人還借寇恂一時賢路闢未許嘆居薪

陳州早發

前人

最戀承歡地翻成踈別時庭梅香拂座岸柳色臨歧日愛白駒影
人懷烏鳥私驪歌催上道迤邐馬行遲

蘇亭蓮舫

汪思廻

偶放湖心棹亭名蘇子由讀書臨水榭把酒載漁舟柳色波啣綠
荷香座入幽夜來風月靜花思欲勾留

望臺烟雨

前人

園僻常宜雨臺高故變烟溪雲籠樹密山翠幔湖妍不盡陳州勝
因思張詠賢追攀尋去住暮靄隔前川

逸園雅集

季一德

邑人下同

亂溪廻合下一徑出松關紅入春前樹青歸雨後山藥欄瑤草

茶竈白雲閒寄語勞生客此中可駐顏

和馮敏齋郡伯己巳除夕同李兼三上舍何樂天山長暨紹

岐合三乾卿茂許四公子唱酬韻

雷方曉

有愁除不得枯坐感年華無術堪名世何山可隱家讀書燈屢撥
催漏鼓聲迴回憶趨庭日淚痕兩袖賒

忽接梅花引聯吟度歲華風流刺史韻春滿野人家已見金聲振
如聞暮鼓搥可知除夕樂斗酒興同賒

次雷驚萬集遊蘇亭原韻

高文相

臺古傍高城乘春郭外行幽光隨地發芳草繞亭生會是東山勝
歌傳白雲清湖光到處好閒坐聽啼鶯

其二倒疊
前韻

前人

代木聽鳴鶯花香入座清臺空人已遠春到水還生綠樹烟千縷

白沙鷺一行新詩吟未就皓月挂東城

贈許明府雙渠八首

錢廷文

俗學何淪雜正聲久微茫我朝論宗匠大抵推漁洋蕭山與秀水
並時相頡頏使君雖晚出文苑有輝光

烟月古揚州忠孝論家世惻愴孤兒行纏綿慈母意經術既通明
文藻復瑰麗豈知白華身終是青雲器

隨牒向何許淇園寄一官蘇門發清嘯響若雲中鸞詔書徵文學
才俊歛彈冠此時薦舉敦迫入長安

待詔金馬門起草明光殿健筆凌烟霄聲名滿畿甸升沉爾自知
得失吾何患望望廣陵濤擾擾河陽縣

我聞淮陽國地當天下郊昔來屬惡歲井邑最蕭條灑涕向飢氓
廩貸一何勞流亡盡復業處處聞謳謠

褒衣被楚風長纓變鄒俗莽莽中原地風氣殊僕邀猗歟神明宰
說士自於肉小善必褒揚寸長亦省錄

矧迺無一長賤子實闕茸猖狂銷壯志懶慢寄幽蹤往者軒車過
劍佩何春容遂使張仲蔚增價蓬蒿中

每讀古人書恨與時代隔及此見班楊何意獲親炙長恐廊廟姿
遷擢在朝夕他年蕃釐觀終有負書客

哭吳明府

洛二首

前八

頻歷淮陽郡風霜歲月侵

公歷任多在陳屬前
後凡三宰淮甯云

形神殊况瘁案牘

亦呻吟未遂歸田計誰明作吏心十年門下士獨有淚盈襟

平生知己分慷慨向誰論顧我偏多感如公竟不存琴書廉吏蹟
風雪病夫門腸斷江南路何年一報恩

義陵嶽峙

雷繼祖

孤峻山如峙巍巍近接雲河圖鍾瑞地古聖有庖墳碑剝留殘字
松高挂晚矐至今瞻望處靈氣尙氤氲

舟中遇雪

吳鳳曉

靈氣塞平川瓊花亂點船四圍樵徑失兩岸玉樓連風急帆收浦
天寒鳥近屢明朝催鼓棹且喜兆豐年

蘇子由讀書臺

胡公裔

蘇子歌吟處而今只舊臺年深餘瓦礫歲久剝風雷野鷺沿堦上
游魚逐浪迴當時幽興極咏盡夕陽隈

絃歌臺

張三樂

聖人無厄地與難亦絃歌上下知交少官商雅韻多相謀圖劍佩
以道化千戈臺畔薰風至猶然鼓太和

蔡池秋月

葉李

靈龜今已逝仍向蔡池遊獨有先天月常懸太古秋一灣霜荻冷
四面水雲浮畫卦遺踪在低徊往復留

九日郡城登高呈邑侯劉志亭夫子

前人

旅邸驚風雨何人送酒來三秋常作客九日一登臺落帽添孤興
題糕愧薄才狂歌復爾爾憑眺在蒿萊

五言排律

奉送漪叔遊潁川兼謁淮陽太守

唐李頎

罷吏今何適辭家方獨行嵩陽入歸夢潁水半前程聞道淮陽守
南東卧理清郡齋觀政日人馬望鄉情嶺雪初霽寒砧霜後鳴
臨川嗟拜手寂寞事躬耕

歲暮卽事寄子由先生

宋張耒

歲暮淮陽客貧閑兩有餘朝昏同壁坐風雪閉門居老去深依佛

年衰更嗜書未能忘素業聊用慰窮途下里皆貧屋開門卽古城
雞豚來近舍春汲賴鄰夫雪壓移來竹霜萎自種蔬烏皮蒙燕几
褐帽裏僧顱肉似聞韶客齋如持律徒女寒愁粉黛男窳補衣裾
已病藥三暴辭貧飯一盂長甌卧墻角短褐倒天吳宵寐衾鋪鐵
晨炊米數珠大撓隨杜脛葛製暖寒軀時命今如此功名已矣乎
談愁風射馬拙待兔逢株久慕真乘樂深諳夢境虛誰憐九頓首
止有一長吁瞻望身空老蒼茫歲欲除何當聞妙誨懸厝待完膚
清

恭祀太昊伏羲氏陵紀事

蔣漣

典文隆邃古廟食首庖犧元氣遙相接靈威儼在斯春風宣詔册
落日上旌旗望宛邱郭行行蔡水湄天門何崑崙周道自逶迤
整佩趨踏日振衣灑掃時金鋪插屈戌網戶對梁恩架屋螭頭攬

垂檐鳥翼插槎枒森萬木突兀列千岬螭篆堯時石蛟蟠徽國碑
幽宮星緯逼秘宅鬼神治髮髯仙官守虛無工祝知別間環小圃
每歲長叢著素質陽光照高原地脉滋莖莖離灌莽葉葉布茂蕤
緬想先天妙誠爲後代師兩儀呈卦象一畫啟爻辭書契應無極
亭臺尙有基軒農陪劍履周孔接鬚眉牲膳羅筵几馨香發鼎彝
試看書大有長得庇羣黎

瑞麥詩十六韻

有小引

郡憲 崔應階

乾隆九年歲在甲子陳郡雨暘時若百穀滋茂夏四月五日
淮甯令許佩璜言兩岐麥秀陳郊持來請驗按視得實竊以
爲昇平嘉瑞越五日據吏傳瓊於北郊獲四穗一本者以獻
乃命吏循行田間則兩岐所在多有旋有南鄉民谷印又呈
一本五穗於庭伏按王者德輅則嘉禾畝載於柱礎信而
可徵今瑞麥疊見象若連珠是誠聖天子至德光大太和翔
洽所以地不變寶麥秀兩岐賦自靈祇實彰聖化用敢函封
申狀大府竊見里井毗庶謳吟成雷臣忝師帥誼應紀實非
敢冀被管絃之未也

八政先民食三農允帝求九重思稼穡萬井亟勸相農無
蠲除渥最優蒼生霖雨沛原隰惠風柔和氣先申夏殊祥
集宛邱瀆田多葆澤嘉種有來牟剪剪方舒慧茫茫旋覆
疇含節甘露潤掩雪宿根稠攢指黃雲卷凝眸碧浪浮五
岐符建極四穗敬天休合璧光華滿連珠曜彩流歲時欣
用乂府事協惟修叠見嘉徵萃差紆宵旰憂受明應共慶
大有定占秋野洽求箱詠衢騰擊壤謳豐亨昭聖化願頌
萬年庥

七言律

贈袁司錄

卽丞相淮陽公之猶子與庭筠有舊也

唐 溫庭筠

一朝辭滿有心期
花發楊園雪壓枝
劉尹故人諳往事
謝郎諸弟得新知
金斂醉就胡姬畫
玉管閑留洛客吹
記得襄陽耆舊語
不堪風景岷山碑

大吉寺

前人

石路無塵竹徑開
昔年曾伴戴顓來
窻間半偈聞僧鼓
松下殘基送客回
簾內玉峯藏夜雪
砌因藍水長秋苔
白蓮社裏如相問
爲說遊人是姓雷

遊趙氏西園

宋張詠

蜀中春豔世間疎
比並陳園恐未如
數里花光浮暝日
六街塵淨見香車
翻空雅樂催歡處
人格新詩上板初
方信承平無一事
淮陽閒殺老尙書

再會傅逸人

前人

分到知心死不輕
幾年曾是滄離情
微風吹雨雁初下
落葉滿堦蟲正鳴
燈靜苦嫌論劍畧
簾涼頻喜轉琴聲
從來其約雲泉老
肯向人間占好名

貽傅逸人

前人

少年名節動人羣，避俗身居積水濱。
幾爲典衣留遠客，半來斂枕看關雲。
門連酒舍青苔滑，路近沙汀白鳥分。
誰道無情活黎庶，數篇新製詠南薰。

懷張白逸人

前人

昔年吟社偶通鄰，常貴高風人格真。
名好已期天共歎，性孤翻與世無親。
梁園醉別花燒眼，楚寺秋歸鶴伴身。
從此幽懷不能說，五湖煙月二京塵。

和子由二首

蘇軾

太昊祠東鐵墓西，一罇曾與子同攜。
回瞻郡閣遙飛檻，北望檣竿半隱堤。
飯豆羹藜思兩鵠，飲河噉水賴長蜺。
如今勝事無人共，花下壺盧鳥勸提。

長明燈下石欄杆長其杉松鬪歲寒葉厚有稜犀甲健花深少態
鶴頭丹久陪方丈曼陀雨羞對先生昔藉盤雪裏盛開知有意明
年開後更誰看

次韻柳子玉過陳絕糧二首

前八

風雨蕭蕭夜晦迷不須嗚叫強知時多才久被天公怪闕食惟應
爨婦知杜叟挽衣那及脛顏公食粥敢言炊詩人情味真嘗遍試
問於今底處虧

如我自觀猶可厭非君誰復肯相尋圖書跌宕年老燈火青燐
語夜深早歲便懷齊物志微官敢有濟時心南行千里成何事一
聽秋濤萬鼓音

陳州與文郎逸民飲別攜手河堤上作此詩 前八

白酒無聲滑瀉油醉行堤上散吾愁春風料峭羊角轉河水渺綿

瓜蔓流君已思歸夢巴峽我能未到說黃州此生聚散何窮已未
忍悲歌學楚囚

樂全先生生日以鐵拄杖爲壽二首

前人

先生真是地行仙佳世因循五百年每向銅人話疇昔故教鐵杖
鬪清堅入懷冰雪生秋思倚壁蛟龍護晝眠遙想人天會方丈衆
中驚倒野狐禪

三年相伴影隨身踏遍江湖草木春
擲石舊痕猶在眼閉門高節
欲生鱗畏塗自衛真無敵捷徑爭先却累人
遠寄知公不嫌重筆
端猶自幹千鈞

宛邱二詠

宛邱城西柳湖累年無水開元寺殿下山茶一株
枝葉甚茂亦數年不開轍向從子瞻遊此每以二

物爲恨去秋雨雪相仍湖中春水忽生數尺至
二月中山茶復開千餘朵因作二詩奉寄

蘇轍

旱湖堤上柳空多倚岸輕舟奈汝何
秋雨連渠添積潤春風吹凍

忽生波蟲魚便爾來無數見鳥猶疑未肯過特託錢塘應笑我劫
中浮芥雨么麼

古殿山花叢百圍故園曾見色依依凌寒強比松筠秀吐豔空驚
歲月非冰雪紛紜真性在根株老大眾圍希山中草木雖攜種潦
倒塵埃不復歸

太昊遺墟

張表

千里垂精帝道尊神祠近在國西門風搖廣殿松杉老雨入修廊
羽衛昏日落狐狸號草莽年豐父老薦雞豚舊遊零落今誰在塵
碣蒼泮字半存

卧病月餘呈子由

前人

風葉鳴窗已復朝喚回歸夢故山遙酒壺暗淡浮塵集藥鼎青燐
敗葉燒閉戶獨依寒蟋蟀移牀更就雨芭蕉雪深欲請安心術長

日如年未易消

白龜靈池

明學 楊廷賓

天將嘉瑞協庖犧
鑿得靈池貯白龜
幾朶閑雲籠曲岸
一泓寒玉漾清漪
時遊蓮畔形偏古
晚曝沙頭色更奇
今日不知仍在否
嗚蛙落月草離離

卦臺秋月

方大美

羲皇御世總承乾
八卦層臺畫宛然
遙想虹蜺流渚日
爭知龍馬負圖年
象涵太極原無極
數定先天起後天
始爲百王開道統
揚雄謾草太元篇

忠陵暮靄

州牧 戴昕

望入思陵暮靄長
天涯誰復見曹郎
亭亭古樹含春雨
閃閃飛鴉背夕陽
七步才名歸寂寞
一迴塵夢合淒涼
無端兩眼懷人淚
拭

向東風謾舉觴

胡公鐵墓

前人

鬱鬱元臺卧草萊周遭鐵色鑄莓苔古波流水消春雪高樹清風
入夜臺石椁不憐司馬死漆燈孤待沈郎來下車我欲尋遺蹟試
把椒漿酌一杯

前題

宋 塘見

傳聞鐵墓柳湖中滿目煙光失舊踪千載暗留懸磬石一泓冷浸
若堂封閑花斷岸隨風落疎葦臨流帶雨衝臙棹不堪重吊古楚
騷難擬思無窮

前題

王良臣

天潢遺派寄塵寰數盡終隨大化還巧鑄鐵棺藏水底光留玉葉
照人問碧潭月冷清侵骨蒼蘚年深綉作斑惟有東風吹暮雨悲

聲隨水夜潺潺

絃歌夕照

顏鯨

素王曾爲楚昭來陳蔡何緣有厄臺道大莫容非是病天當終定
不須猜衣冠十哲先顏閔書社千年只草萊攬轡偶從祠下過古
槐森影轉蒼苔

前題

秦金

素王新構渺何依陳蔡遺墟草樹稀愜見仲由誰物色屢空顏氏
自天機絃歌萬古聲如在兵甲諸候事已非此日辦香還再拜乾
坤吾道總光輝

送憲副陳一初之楚

王祖嫡

十載爲郎重度支千旌今日耀江湄臬垣清挹雄風賦燕寢歌傳
郢雪詞下榻陳蕃空悵別登樓王粲獨凝思湖南湯沐應深念願

起瘡痍答上知

寄憲副陳一初

張九一

十年休汝雀羅張，獨有論交意未忘。
卜鳳宛邱推敬仲，占星潁水得元方。
冥心去就風塵遠，病肺河山著作長。
月色梁間皎然出，恩君彷彿在君傍。

柳湖春曉

睢陳道 蘇光泰

子由人去幾經秋，臺榭猶看說子由。
當日傳經寧寂寞，至今對景憶風流。
湖邊花鳥無今古，亭外雲霞自去留。
此地重來攜二友，憑誇赤壁羨遨遊。

伏日太昊陵寓目同黃工部許山人

前人

風雨空庭合有神，重來抱酒興無垠。
一枰似列河圖數，半壁如懸滄水濱。
天地浮沉容白叢，古今變態總紅塵。
微醺聊藉風生簟，信

是義皇以上人

送趙戶部出守淮陽

李攀龍

仙郎起草漢明光，幾載軍儲事朔方。
五馬新爲淮海郡，二臺舊署
度支章。行車麥秀隨春雨，卧閣花深對夕陽。
時憶上林詞賦客，鴻書遙下楚雲長。

過七步

在陳許城東即曹子建墓地

閻爾梅

籀篆螭碑一路穆，山川平借古人留。
中原繡虎曹陳郡，南國荒雞祖豫州。
金石精華開氣數，漁樵文字發冬秋。
無家莫作窮愁看，晚歲功名是浪遊。

詠陳州二首

僉事 劉咸

胡公鐵墓魏思陵，遙接焦夷近蔡城。
太昊堞著猶有廟，神農辨穀已無營。
危臺夜月麒麟泣，卧閣天寒翡翠鳴。
晚過狄青荒塚下，似

聞蘇子讀書聲

司城貞子已云亡獨上澹臺憶子張黃霸功名今寂寞趙雙祠墓
總荒涼三般行著巢多燕二謝詩工草一塘最羨漢時陳孝婦至
今史傳有遺光

揅著臺

參政王概

高臺突兀接荒城風雨年年著草生鳳尾飄蕭雲氣溼龍頭天矯
露華清重瞳此日升雙闕一本何時滿百莖安得神龜常守護靈
根直擬獻承明

懷古

馬嵩

名垂三恪舊皇都幾度豪雄愜壯圖水底鐵棺今尚在城頭烟色
半如無雲藏廢閣人思黯花落遊亭客弔蘇行樂正當春景暮柳
湖啼鳥一聲孤

宛邱署中

泰政
吳國倫

列騎中原問俗遊，淮陽風物古名州。
花間雨過襜帷爽，竹裏雲生署閣幽。
封建總非三恪舊，絃歌猶自十賢留。
乾坤未盡銷兵甲，無力能分聖主憂。

弔岳武穆廟

蘇光泰

武穆祠堂寒色侵，空庭啼鳥畫陰陰。
風雲不散衝冠怒，日月長懸報國心。
豺虎可投應有恨，犬羊何事不成擒。
神州未復身先殞，每令招魂淚滿襟。

前題

睢陳
道 徐即登

宋代諸陵何處尋，鄂王祠廟肅陰陰。
金牌詔數催和急，鐵騎聲聞轉戰深。
知過二桃三字獄，冤銜六檜萬年心。
英雄遺恨今猶在，長護中原壯帶襟。

將去陳喜諸生遠來赴會

前八

吾道誰云尙阨陳
斐然多士總爲鄰
硜硜荷蕢知音者
雨雨風風
得趣人孝弟更無堯舜道
行藏惟有孔顏真
淵源伊洛追鄒魯
出谷嚶鳴及早春

重來陳州感興

前八

十載參藩此再遊
陳州回首是并州
兒童竹馬紛相逐
士子絃歌好更酬
人物風流原不改
山川氣色似增麻
却憐此地曾遭阨
往事於今逐水流

弔司城貞子閣

州同王舉

先生家住古城隈
應有虹光出草萊
靈鳥自娛林下日
聞雲不染世間埃
琴書每得賢材煖
門巷時迎聖轍來
千載令人懷麗澤
不勝追弔重徘徊